

18 JUL 2002
Malaysia-Iran
PRESIDEN IRAN MELAWAT MALAYSIA SELAMA TIGA HARI

KUALA LUMPUR, 18 Julai (Bernama) -- Presiden Iran Seyed Mohammad Khatami akan melakukan lawatan negara tiga hari ke Malaysia bermula 21 Julai, menurut Wisma Putra hari ini.

Lawatan itu merupakan yang pertama bagi Khatami ke negara ini dan ia adalah atas jemputan Yang di-Pertuan Agong, kata Wisma Putra dalam satu kenyataan di sini, hari ini.

Lawatan terakhir oleh seorang ketua negara dari Iran dilakukan oleh Presiden Akhbar Hashem Rafsanjani pada 1994.

"Objektif utama lawatan Khatami ialah untuk memperkukuhkan dan meningkatkan hubungan dua hala antara kedua-dua negara," menurut kenyataan itu.

Presiden Iran itu akan diiriingi oleh isterinya Zohreh Khatami Sadeghi dan delegasi 91-anggota termasuk lima Menteri, lima Timbalan Menteri dan para pegawai kerajaan.

Program lawatan itu termasuk upacara mengadap Yang di-Pertuan Agong Tuanku Syed Sirajuddin Syed Putra Jamalullail dan Raja Permaisuri Agong Tuanku Fauziah, satu majlis santapan malam dianjurkan oleh baginda berdua dan satu pertemuan bersama Perdana Menteri Datuk Seri Dr Mahathir Mohamad.

Menurut Wisma Putra lagi, pertemuan antara Khatami dan Dr Mahathir dijangka membincangkan isu-isu dua hala, serantau dan antarabangsa yang menjadi kepentingan bersama.

Beberapa Memorandum Persefahaman (MoU) mengenai kerjasama dalam bidang perdagangan, wanita dan pembangunan keluarga, teknologi komunikasi dan maklumat dijangka ditandatangani semasa lawatan itu.

Kenyataan itu menyebut Khatami juga dijadual menyampaikan ucap tama di satu seminar anjuran Institut Strategik dan Kajian Antarabangsa (ISIS) yang bertema "Dialog Antara Tamadun dan Cabaran-cabaran."

Khatami juga akan melawat Perbadanan Pembangunan Multimedia, Muzium Seni Islam dan Menara Berkembar Petronas, bangunan tertinggi di dunia.

-- BERNAMA
SR MAM PR